

Exelénsia....

Onra bot ba ha'u bele mai ko'alia iha fatin ida ne'e, iha ámbitu komemorasaun ba tinan 30 vizita Amu Papa Santu Padre Joao Paulo II iha ita nia rain, Timor-Leste. Santu Padre Joao Paulo II nia vizita mai Timor-Leste, loke mundu nia matan atu hare povu Timor nia terus, loke mundu nia tilun atu rona lian husi lian laek sira.

Maluk sira....

Hahú husi Santu Padre nia vizita mai ita nia rain, Timoroan sira harii sosiedade ida ne'ebé solidária, sosiedade ida ne'ebé tane as sentidu fraternidade, ho objetivu atu hamosu forsa komún ida hodi sustenta ita nia luta ba ukun rasik an. Tanba ne'e, pertinente tebes bainhira iha konferénsia ida ne'e, ita foti tema “dezenvolvimentu ba sosiedade ida ne'ebé solidária no fraterna!”

Maluk partisipante sira....

Hahú kedas husi prosesu hakerek ita nia konstituisaun, Assembleia Konstituinte ne'ebé kompostu husi partidu polítiku sira nu'udár representante povu nian, prevee ona iha ita nia lei inan katak sosiedade Timor-Leste nian tenke harii iha prinsípiu solidária no fraterna.

Sosiedade ne'ebé solidária no fraterna kontempla iha Preámbulu ita nia Konstituisaun ne'ebé hateten katak, Timor-Leste tenke harii nu'udár nasaun ida

ne'ebé justu no buras, hodi mós foti sosiedade ida ne'ebé hakiak ema atu fó neon-laran ba malu (solidária) nu'udár maun-alin (fraterna).

Maluk sira hotu....

Iha sosiedade kontemporáneu, solidariedade kontinua sai nu'udár dimensaun sentrá ba kultura, iha vida institusionál ka interasaun loron-loron nian. Tanba ne'e atu garante sosiedade ne'ebé solidária no fraterna, estadu iha obrigasaun atu hare ba kestaun sira ne'ebé asegura prinsípiu jerál ba bem-estar estadu tomak nian.

Parlamentu Nasionál nu'udár órgaun lejizlativa sempre buka kolabora ho órgaun ezeutivu atu asegura katak, orsamentu ne'ebé aloka ba dezvoltamentu iha ita nia rain, kobre prinsípiu jerál ba bem estar povu tomak nian, inkluidu, setór justisa sosiál ne'ebé kobre area edukasaun, saúde, agrikultura, no seguransa sosiál.

Maluk partisipante sira,

Iha tema ba debate iha eventu ida ne'e, ita mós foti asuntu: "tansá iha impasse polítika?" Nu'udar Prezidente Parlamentu Nasionál, ha'u hakarak hateten de'it katak, iha estadu direitu demokrátiku, konstituisaun maka dalan atu regula funksionamentu estadu nian.

Iha sosiedade ida ne'ebé solidária no fraterna, tuir filózofu polítiku balun hateten katak, atu asegura estabilidade política, simplesmente tenke iha respeito ba prinsípiu demokrasia ne'e rasik, ida ne'e katak: se ema hotu konkorda atu foti desizaun bazeia ba prinsípiu democrátiku, maka ita tenke kumpre no respeito rezultadu ne'e, so nune'e maka prosedimentu democrátiku ne'e sei estavel, se lae maka bele monu ba estadu falhado tanba la respeita rezultadu ne'ebé povu fó iha eleisaun.

Por-enkuantu, iha ita nia situasaun, ita halo tiha konkordánsia atu foti desizaun tuir prinsípiu democrátiku, maibé ita rasik maka laiha kompromisu atu kumpre konsensu democrátika ne'e. Tanba ne'e maka oras ne'e ita enfrenta hela impasse política iha ita nia rai laran.

Maluk sira hotu,

Mezmu ita iha hela impasse política, Parlamentu Nasionál kontinua fó apoiu ba Governu, atu Estadu kontinua asegura dezvoltamentu ne'ebé iha impaktu direta ba sosiedade, liu-liu iha setór saúde, edukasaun, no seguransa sosiál.

Maluk sira,

Nu'udár Prezidente Parlamentu Nasionál, ha'u nafatin iha esperansa katak Timor-Leste sei la'o ba oin, sei atinje duni objetivu atu sai nasaun ne'ebé justu no buras, hodi mós foti sosiedade ida ne'ebé hakiak ema atu fó neon-laran ba malu nu'udár maun-alin, tuir preámbulu ita nia Konstituisaun nian.

Obrigadu